



13.

QUÆSTIO MEDICA,  
QUODLIBETARIIS DISPUTATIONIBUS  
MANE DISCUTIENDA  
IN SCHOLIS MEDICORUM



Die Jovis 18 mensis Decembris 1721.

M. JACOBO TRANT,  
DOCTORE MEDICO, PRÆSIDE.

*An passio vulgò hysterica dicta ab utero?*

I.

CUM multi sunt morbi, quibus conflantur miseræ mulieres, cum nullum omnino reperias femineo sexui aut familiarem magis, aut sæpius importunum quam ægritudinis genus illud, cui passionis hystericæ nomen recentium Medicorum autoritas veterum exemplo imposuit. Et malum quidem hoc *ὁ ὑστερικὸν πάθος*, sive *ὁ ὑστερικὸν πρὶς* Græcis audiebat, quod existimarent morbum, si quis est, pertinacissimum ab utero malè scilicet affecto sic pullulare, ut aliundè nec gigni posset nec deberet. Uterum enimverò, sursum ferri, deorsum moveri, *ἀεὶ καὶ πάλιν*, appetere, fugere, amare, odisse non autumabant modò, sed asseverabant, sic quasi necessum esset cudendi hominis officinam iisdem fermè, ac animadvertimus hominem ipsum, virtutibus insigniri. Verùm uteri in hypo-

Δ

gastrio situs, vineula, quorum beneficio tam infernè, quàm superne variis corporis partibus alligatur; ipsius indoles partis atque natura, quæ cultri anatomici ope vel leviter intellecta, rationis usum præstantissimo alioquin visceri non competere satis superque declarat; hæc inquam omnia certò certius arguunt, utrum ut à præpotente Deo nobilissimo muneri destinatum, tamen esse, non secus ac plurimas corporis partes, quodam modo viscus & *divisor & amplex*. Quod enim iisdem planè rebus constare deprehenditur, ac musculorum membranarumque compages, cum muscularis membranisque officii ratione consentit.

## II.

**S**YMP TOM ATA græcè sonant idem, ac latine accidentia; seu quæ fortuito casu contingunt. Nos mechanicà necessitate niti ponimus ægritudinum symptomata, quæ quemadmodum à morbo sunt, ita morbi causam, indolemque demonstrant. Ne credideris tamen symptomatum in eo positam esse rationem, ut nulla sint, quæ natales suos non designent & originem. Est verè medentis circumspicere, symptomatumque plerumque congeriem in eum coacervare finem, ut morbi tum causa, tum species ex his signis eruantur. Symptomatum ergo varia est multumque diversa ratio. Est enim, quod morbum mentitur non suum; est, quod morbum etiam suum dissimulat; est, quod propriè dicti symptomatis larvam induit; est denique quod morbum, unde fluit, nunc innuit malignè, nunc luculenter & satis apertè docet. Huiusmodi symptoma signum vocant pathognomonicum; quod cum rariùs occurrat, sapienter est ex observationum fontibus ea derivata lex, ut non nisi ex symptomatum plerumque syndrome sit tractandorum morborum methodus instituenda. Præcipimus igitur, ut ne morborum indolem causamve inde quis putet interpretandam, unde morborum cognitio incerto vel unius, vel pauciorum symptomatum argumento deduci posse comperitur. Symptomata, quibus observatur stipari passio vulgò hysterica dicta, uteri morbum arguere non videntur.

## III.

**Q**UÆ symptomata designant passionem vulgò hystericam dictam; sunt præsertim dolores colici, Borborygmi, tensiones hypochondriorum, intestinorum, musculorum abdominis, aliarumque partium convulsivi motus, vomitus enormes, sensus doloris perquam importunus ponderis suæ gravitatis oblici, quasi plæ ascendentis pubis osse usque ad laryngem, risus, non voluntatis, sed morbi imperio elicitus, profusa lachrymæ, diaphragmatis tum convulsiva, tum tonica contractio, unde anhelitus & strangulatio. Hæc si quis viderit, observaverit, expenderit, intelliget profectò aut totum corpus peccare, aut si morbum alicui corporis parti esse statuer adscribendum, eum non ab utero, sed aliunde proficisci.

## IV.

**Q**UOD spectat hujus mali remedia, nemo nescit ea esse ejusmodi, quibus uteri minus, quàm aliarum rerum vitia, cor-

3  
 rigi soleant, & salubriter emendari. Obvium est illud & Medicis haud ignotum, fœminas, quò sunt habitiori corpore, quò sunt desides magis, quò sunt in venerem negatam proniores, eò passionis hystericae telis esse magis opportunas. Non inde colliges tamen, aut cumulatam è vitâ deside pinguedinem, aut negatam viri consuetudinem, aut copiam alimenti, quàm par est, uberiorem, si quid peccant, labem suam utero potius inurere, quàm aliis corporis partibus, quas non modò rationis argumentum, sed etiam adhibendorum remediorum fides, mali sedem esse declarant. Remedia, quæ in hoc morbo non modo nuncupantur, sed & sunt herculea; sunt imprimis chalybeata, nervorum tonum; narcotico-volarilia, spirituum, si qui sunt, animalium crasim copiamque resarciencia. Hæc autem emendandis uteri vitiis quemadmodum vix conferunt, sic ad aliarum corporis partium morbos tollendos, evellendosque facere deprehenduntur. Unde non symptomata modò passionem vulgò hystericam dictam stipantia, sed & remedia ad profligandum malum feliciter excogitata, sic alias corporis partes spectant, ut uteri neque morbum illa, neque hæc medelam significant.

#### V.

QUOD Græcis *νεῦρον*; illud Romanis, nervus est. Utrumque vocabulum ad funiculorum silvam è cerebro & spinali medullâ propagatam pertinet magis, quàm ad musculorum extrema; quæ quemadmodum nos semper tendines, sic illi nervos nonnunquam appellabant. Invaluit tandem mos, ut nervorum nomen diffusis è cerebro, cerebello, & spinali medullâ funiculis tribueretur solis, nec ad aliud quid indicandum dubiâ significatione traheretur. Nervos ex ossibus, quibus involvuntur, speluncis in totum corpus expatiari, & in ramos ramusculosque propemodum infinitos dispartiri, nemo nescit. Hinc sensûs & motûs petas originem. Nam abscisso, ligato, obstructo nervo, aut sensum periri, aut aboleri motum, aut utrumque perire contingit & prorsus extingui. Jam verò si perpenderit, quot quantique motus in corpore humano præter voluntatis imperium fiant, rectè cæteroquin intellectâ nervorum indole; non dubitabis affirmare hæc eadem sensûs & motûs instrumenta, quantum otii malè feriatî desidiâ peccant, tantum præposterâ diligentîâ & immodici laboris furore nocere. Sed quo mechanismo motûs aut aucti, aut insigniter imminuti, aut sublati penitus & extincti rationem in nervos, tanquam in genuinos fontes duxeris esse refundendam? Rem periculosâ plenam aleæ ne scrutare curiosius, ne difficillimarum nugarum scopulis allidas navem velo remoque carentem. Nam qui spiritus animales in nervorum cavo cursitare dixerunt, rationem ducem videntur secuti. Omne tulissent punctum, si quam ratio suaserat viam, eam experimenta sæpius quàm feliciter tentata perfuassissent. Suos etiam patiuntur manes, qui nervos negant esse inæbiles, & ducto à fidibus exemplo, nervorum motum, ope vibrationum scilicet & undulationum enucleare conantur. Verùm quicquid hi, illi, in contrarias par-

4

res disputent, sufficiat innotescere nobis, à nervis motum omnem seu sumque proficisci. Ergo non modò naturales, sed & qui fiunt præter naturam motus à fibris nerveis cùm pendeant, consequens est convulsiones tum alias, tum hystericas à nervis, tanquam à causâ proximâ constanter oriri. Nam sive à spiritibus animalibus convulsivos inchoari motus atque absolvi suspicere; sive à solidâ nervorum compage non aperiri modò, sed etiam claudis scenam existimes; *avayé* Authores, subtilissimo liquore vel instructos, vel destitutos nervos semper agnoscas, oportet. Nam spirituum animalium propugnatores aiunt spiritus in morbis convulsivis æquo copiosius, aut solito facilius fluere in partes morbo conflictatas. Hujus rei forsan suspicantur inde petendam esse rationem, quod aut justo patentior est spirituum ad partes convulsas via, aut justo strictius ad partes non convulsas iter, aut quòd in eundem effectum utraque causâ conspirat. Qui solidam esse nervorum compagem ponunt, ab eorum vibrationibus & elatere motus tum naturales tum præter naturam deducendos esse defendunt. Sed missis opinionum tenebris, ne in fiendi modum lepidè magis quàm utiliter introspeciamus; sentiamus quod res est; & , si quidem nullus ambigit quin systema nervosum spasmos suo quodam sibi jure vindicet, pronunciemus passionem vulgò hystericam dictam, à nervoso genere sic pendere, ut ab alio fonte non intelligatur proximè posse deduci. Quid quòd utrum si culpaveris, quid sentiendum putabis de morbo virorum, quam Antiqui melancholiam nuncuparunt? Licèt enim ab utero non pendeat, ejusdem tamen est indolis, ac mulierum morbus, passio vulgò hysteric dicta.

*Ergo passio vulgò hysteric dicta non ab utero.*

Domini Doctores disputaturi.

<i>M. Emmanuel - Mau-</i>	<i>M. Jannes-Francisus</i>	<i>M. Raymundus - Jaco-</i>
<i>ritius du Verney.</i>	<i>Leaulié.</i>	<i>bus Finot.</i>
<i>M. Ludovicus - Clau-</i>	<i>M. Jacobus - Antonius</i>	<i>M. Philippus - Bernar-</i>
<i>dus Bourdelin.</i>	<i>Miller.</i>	<i>dus de Bordegaraye.</i>
<i>M. Michael-Ludovi-</i>	<i>M. Michael Peaget.</i>	<i>M. Ludovicus Lemery,</i>
<i>cus Vernage.</i>		<i>Regia Scientiarum</i>
		<i>Academia Socius.</i>

Proponebat Parisiis NICOLAUS LE ROY, Rothomagus, Baccalaureus Medicus, A. R. S. H. 1721,  
à sextâ ad meridiem.

Typis J. QUILLAU, Universitatis & Facultatis Medicinæ Typographi.